

**Sud Bosne i Hercegovine**
Суд Босне и Херцеговине

Broj: SI 3 Iž 030880 18 Iž
Sarajevo, 30.10.2018. godine

Sud Bosne i Hercegovine u Sarajevu, u apelacionom upravnom vijeću sastavljenom od sudija, Srete Crnjak, predsjednika vijeća, Dinke Bešlagić-Čovrk i Vesne Trifunović, članova vijeća, odlučujući o žalbi Saveza za bolju budućnost BiH-Fahrudin Radončić, Sarajevo, Tešanjaska 24a, izjavljenoj protiv odluke Centralne izborne komisije Bosne i Hercegovine, broj: 05-01-07-5-1043-5/18 od 22.10.2018. godine, u pravnoj stvari izricanja novčane kazne, u nejavnoj sjednici održanoj dana 30.10.2018. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je prigovor političkog subjekta Savez za bolju budućnost BiH-Fahrudin Radončić koji se odnose na kršenje odredbe člana 7.4 stav (1) tačka 3) Izbornog zakona BiH od strane Šefika Džaferovića kandidata političkog subjekta Stranke demokratske akcije za bošnjačkog člana Predsjedništva BiH.

Politički subjekt, Savez za bolju budućnost BiH-Fahrudin Radončić je blagovremeno uložio žalbu na navedenu odluku. U žalbi, navodi da izjava koja je data medijima na dan izbora od strane Šefika Džaferovića kao kandidata za bošnjačkog člana Predsjedništva BiH, kao i činjenice da je bilo za očekivati da će biti objavljena, i to u dijelu izjave "Očekujem da snažno pobijedi SDA.. u mom dubokom uvjerenju to je najbolji odgovor na političku situaciju u kojoj se nalazi BiH". Analizom navedene izjave koja je objavljena na internet portalu klix.ba ima za cilj uticaj na birače, te predstavlja nedozvoljeno korištenje takvih sredstava u smislu člana 7.4 stav (1) tačka 3) Izbornog zakona BiH.

Zato predlaže da se žalba usvoji i izrekne sankcija političkom subjektu SDA i Šefiku Džaferoviću kandidatu navedenog političkog subjekta za bošnjačkog člana Predsjedništva BiH.

Centralna izborna komisija BiH je u odgovoru na žalbu predložila da se žalba odbije kao neosnovana.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije Bosne i Hercegovine kojom je odbila prigovor žalitelja kao neosnovan, sa obrazloženjem da politički subjekt SDA povodom izjave kandidata za bošnjačkog člana Predsjedništva BiH Šefika Džaferovića koja je objavljena na internet portalu klicks.ba na dan izbora 7.10.2018. godine, ne predstavlja prekršaj iz odredbe člana 7.4 stav (1) tačka 3) Izbornog zakona BiH.

Naime, nesporna je činjenica da je nakon obavljenog glasanja na biračkom mjestu u Zenici, kandidat za bošnjačkog člana Predsjedništva Šefik Džaferović popraćen od strane medija i na njihovu inicijativu dao za medije izjavu. Izjava je data na način da je odgovarajući na pitanja novinara, šta očekuje od izbora budući da je jedini kandidat iz Zeničko-dobojskog kantona, iznio svoja očekivanja, što ustari predstavlja uobičajenu izjavu na biračkom mjestu nakon obavljenog glasanja koju daju svi kandidati.

Ne može se prihvatiti žalbeni navod da izjava predstavlja političku aktivnost s ciljem uticaja na birače koja počinje teći 24 sataprije otvaranja biračkih mjesta i traje do njenog zatvaranja propisana odredbom člana 7.4 stav (1) tačka 3 Izbornog zakona BiH.

I po shvatanju apelacionog vijeća, izajva data novinarima koja je objavljena na internet portalu klicks.ba, iako je u objavljena u periodu izborne "šutnje" tokom izbornog dana, ne predstavlja političku aktivnost, ni uticaj na birače da glasaju za navedenog političkog subjekta i njegovog kandidata, nego je to samo lični stav o trenutnoj političkoj situaciji i njegova subjektivna očekivanja za rješavanje problema u budućnosti.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10) valjalo odbiti.

**PREDSJEDNIK VIJEĆA
S U D I J A
Sreto Crnjak**